



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :



Tir Yimym



tiryimym@aolima




tir yimym

TAPAK 7

McKeown-i backstroke swimming record ajak benogo

Taoba Pakistan PM Nawaz Sharif kidangi meyipa aruogo



VOL. XXI NO. 15 (ADOK 15) DIMAPUR

AMUNGNÜ (SUNDAY)

MONGPUTENI (OCTOBER) 22, 2023

₹ 5.00

Dr. Shürhozelie Liezietsu-i NPF tir menden toktsür; Apong Pongener-i melenzüksü

Kohima, October 21, 2023 (TYO): Dr. Shürhozelie Liezietsu-i Naga People's Front (NPF) nung mapang talangtiba Tir inyaka arur sodi agiogo.

"Ni iba party nung aso aser life member ka lir. Ni menden nung amenba-mamenba nung tepila kecha mali kechiyong nübortemi kü dang nungi shisatsü agir aser amalitepa inyaker" ta Dr. Shürhozelie-i ashi.

Honibarnü Capital Cultural Hall, Kohima nung NPF General Convention cum Foundation Day amongdang Dr. Shürhozelie-i tir menden nungi sodi agia liasü.

"Ni tir ka ama inyaka arudang nisung aika melapatsüsa lemtelem agiogo saka ibaji tezüng agi melaba Committee kati ashiba nung ajemdaker inyakba liasü. Ni tatembang tetuyuba ka magidang Committee-i pamok tebilembatem tamasa lemsateper" ta Dr. Shürhozelie-i ashi.

"Party dangi aruba ken o ji tamasa Committee ajanga jangjateper aser züngsem kati temzüng alema inyakba kuli anguba sülen ang tatembang lemtet agia mapa inyaker. Ni party züngsem kar meindokogo saka party policy nung



NPF tir nungi sodi agir Dr Shurhozelie Liezietsu den president elect Apong Pongener aser Central ketdangsürtem den Manipur nungi lennirtem külemi agiba noksa ka angur.

ajemdaker aika anentsüogo. Kechi onük atema inyakba süaka ni kü medemer tejen aika meladaksüba atema tatok meshir" ta paisa shisem.

Paisa party züngsem ajak dang senden amendang sarasademer tenzüksü aser sarasademer tembangtsü atema ayongzük.

"Asenok dak malangaka aseni inyakba mapa ajak nung Tsüngremer shisatsü meshitsüla. Asenok ajak temenenpurtem dang lir aser Tsüngrem sentsüwangshi matong saka asenok ajak

longjemer asen nübortem tarutsü tajung atema inyakba ya Tsüngrem tsüngdang shitak asütsü ta ni amanger. Teti Tsüngrem bushiang aser nenok tarutsü atema moatsür" ta Dr. Shürhozelie-isa ayongzük.

NPF ya Naga nung ajak atema noktakba telok lir aser Naga loktiliba nung tera yanga lir. Iba regional party ya 1963 küm tentet aser lia arudang tensa den apet tenüng aiben melenogo saka an tebong maitsübo memelensi, ta pai metetdaksü.

Azü aser nüktzü ayimba mapang ka an tebong party ta

tentet aser Naga nung temetentem kümzüka ayutsü atema nükjidong yur iba telok tenzük" ta Dr. Shürhozelie-isa metetdaksü.

"Tanü asenoki menungnangi Nagaland nung alirtem dang Naga nung maitsü aser taginüba atema noktakba telokji NPF dang lir ta shiteter. NPF-i Naga nung ajak atema noktaker kechiyong iba telok ya Naga loktiliba aser Naga putiotsü nung tera yanga lir" ta paisa ashi.

NPF president elect Apong Pongener-ia o jembidang "kümtem süia arudang Naga

nungeri tajung-tamajung aika ajangshia aruogo saka NPF-i Naga nung asoshi mangdang aser alizüng ayubatem tashitaitba kümogo" ta ashi.

Apong ya tesüiba kümsük 3 tashi NPF working president ama inyaka aruogo aser pai January 1, 2024 nungi NPF president inyaksü.

Apong Pongener ya 1972 küm UDF ta alidang nung dena aruba tanü Naga Peoples' Front ta tenüng melenba tashi züngsem tajung ka lir.

"NPF ya Naga nung aser lisopurtem tarutsü atema noktakba telok ka lir aser iba tangatetba ajanga asenok teti longjema aser tashi itta alitsü" ta Apong-i ashi.

"Tanü alima nung politics ya maongka angutsü atema inyaker saka onoki tangatetba shitak nung party politics maneni inyaksü" ta paisa ashi.

Dr. Shürhozelie Liezietsu-i mapang tamajung nung party len anir aruba atema pa aser NPF züngsem ajak tenüng nung pelar aser tenüngsang agütsür ta Apong-isa ashi.

"Onok len anitsü asoshi Dr. Shürhozelie shisatsü aser tangatetba maneni angutsü imlar" ta paisa shisem.

Tapi by-election atema nomination papers repringogo

Mon, October 21, 2023 (DIPR): October 21, 2023 nü 43 A/C Tapi by-election atema agütsüba nomination papers repringdang agizükogo.

Honibarnü SDO(Civil) Hq and Returning officer, Rongsenmla indang office nung NCS General observer Patibandia Ashok Babu, IAS aser Nationalist Democratic Progressive Party (NDPP) o Indian National Congress (INC)

candidate atema teshimtet nübortem lia nomination papers maparen inyaka liasü.

Candidate anaprongi agütsüba nomination papers ajak shitak dang liasü aser iba jagi tena 14 buba Nagaland Legislative Assembly-By elections 2023 nung tokteptsü temsüa lir ta sangoktsüogo.

43 Tapi assembly by-election ya November 7, 2023 nü agitsü sentong lir.

NPF-i Naga yimten tebilemtsü atema bangjemtep

Kohima, October 21, 2023 (TYO): Naga yimten tebilemtsü ya Naga nung ajak densema aser agizüktsüsa latettsüla ta Naga People's Front (NPF)-i tanü nenshia bangjemtepogo.

October 21, 2023 nü Nagaland nungi dang masü saka Manipur aser Arunachal Pradesh nungi party züngsemtem adenshia Foundation Day amongdang NPF-i iba tenangzükba agishiogo.

NPF-isa Naga nung aliba tesemtem nung party pusemertem aser meimer ajak dang pelaba metetdaksü.

NPF tir menden nungi sodi angur Dr. Shürhozelie Liezietsu-i küm 50 tema party atema inyaka aruba asoshi kanga pelar ta tanü NPF mungdangisa metetdaksü. Parnokisa NPF Legislature

Party leader Kuzhulozo Azo Nienu lenisüba sülen anidaksü bangjemtep.

Central Election Board-i 2024-2028 kümsük atema Central Office Bearers aser Central Frontals lennirtem shimba pusema nungiter aser Party Constitution nung lateta aliba ama party Tir tasenba kübok inyaka aotsü ta mungdang nung adentemisa lemtet.

Manipur State Unit-i teti Central Office aser party nungita yariba atema NPF-isa parnok nem tenüngsang agütsü.

NPF general secretary aser member secretary Resolution Committee Akho Leyri-i mungdang bangzüng renemba bener arua telok den lemsateper aser ibaji nisung ajaki teka metonga agizük.

Nagaland nung Police Commemoration Day among



Nagaland DGP Rupin Sharma-i tasürtem bilemtetba nungshilung nung tetushi agütsüba angur.

Kohima, October 21, 2023 (TYO): Honibarnü PHQ Kohima nung Police Commemoration Day amongdang police 189 nem tetushi agütsüogo.

September 1, 2022 nungi August 31, 2023 tashi linük tenzüka arudang Nagaland Police ana L/NK T. Zewangba Yim (3d NAP0) aser Constable Kevisekho Khate (10 NAP (IR) ajanga taküm bendang agütsüogo.

Kümshia October 21 nü Police Commemoration Day amonger aser iba ya 1959 küm DCIO Karam Singh-i anir rescue mission ka inyakang lendong atalokba bilemteta amonger. Iba anogo nung Chinese sepaitemi Ladakh kübok Aksal, Chin area nung India police amak ta DGP Rupin Sharma-i ashi.

Idangji India police 10 taküm sama aser November 13, 1959 nü China-i parnok tasü mang agütsü aser November 14

anepdang 8:00 ako nung Ladakh nung aliba hot springs nung arem. Iba tesem nung martyrs memorial ka yanglua lir aser police-i kümsüa semdanga tetushi agütsür.

1960 küm state ajak nungi police tekolakpurtemi October 21 anogo India ajungalen Police Commemoration Day amongtsü lemtet, ta DGP Rupin-isa ashi.

"Iba anogo nung Ladakh nung taküm bendanga agütsürtem dang masü saka mapa teinyakdak nung taküm bendanga agütsüba Indian Police ajak bilemteter" ta pai ashi.

"Iba anogo nung ozüng amertem tasü aitiba, bendanga agütsüba aser nendaka inyakba atema tetushi agütsür. Külem sensotem lendong balala nungi kümsüka ayutsü merangdang taküm bendanga agütsüba police ajak nem tetushi agütsür" ta Rupin-isa ashi.

Nisung ajaki police akhümtsübuttsüla saka police-ia asentzü yima aser meranga inyaksüla. Police-i tensa süngjema ayutsü atema tebilemtsü khuret bena inyaksüla, ta paisa ashi.

Alima lendong-tsüdong atalokdang police-i first responders ama inyaker, traffic ketdangsüba nung yariteper aser khuret ajurudang tangari memeteti mapa aika inyaker ta Rupin Sharma-isa shisem.

"Tetsüba maliba loktiliba ka dang azükarua otettsü aser iba atemaji police-i inyaker. Police-i linük nung lateta aliba ozüngtem aser Bible, Bhagvad Gita o Holy Quran ajak densema yangluba Constitution mapa küma inyaker" ta paisa metetdaksü.

DGP Rupin-i anir police-i police 189 nungtem nung yangluba nungshilung nung naru yuja tetushi agütsü.

Angh Ganesan-i AR sepaitem tushiba sentong nung shilem agi



Angh La. Ganesan den Governor's Medal anguba Assam Rifles sepaitem tangokba noksa nung angur.

Dimapur, Mongputeni/ October 21 (TYO): October 21 nü Dr. Imkongliba Ao Hall, Raj Bhavan Kohima nung Assam Rifles sepaitem nem tetushi agütsüba sentong nung Angh La Ganesan-i shilem agiogo.

Duty nung tangar dak nung alaka bendanga agüja inyakba Assam Rifles personnel tem nem Gold aser Silver medal aser AR Unit tem nem tenüngsang agütsüba kuli kaket agüja liasü. Pai ashiba agi, iba sentong ajanga linük nung Armed Forces temi tasü ita mapa bendanga agüja inyakba tanüla sayur.

Angh-isa, Assam Rifles yagi linük paramilitary force tejentiba ama defence renlok aoba nung tongtibang shilem agiogo, ta ashi. Paisa, linük arrtsü aser talisa North-East nung tenem limatem nung inyaksangshi kanga tasak süaka AR-i item tesemtem kümzüka ayuba nung shilem tajung agiba ya tushitsü langa lir, ta ashi

Pai ashiba agi, NE nung yimjung aser terenlok asoshi

AR-i tongtibang shilem agiogo aser lokti tentet aser department balala den teka amteper inyaka aruogo. AR-i, nüburtem asoshi sentong balala ayongzükja agiyonga aruba ya tenüng asangtsü langa lir. Küm tem tsünga parnoki parnok ya tenem nung aliba nisungtem tembar ta kuli agütsüogo, ta pai ashi.

Medal angurtem den jembiba mapang Angh-i ashiba agi, tangar dang nungi alakteta bendanga agüja aser tasüita inyakba ajanga parnok ya iba tetushi award agizükter kaka akümba dang masü saka iba ajanga parnoki linük asoshi bendanga agüja tenzüka sayur.

Ganesan-i, parnok mapa tajung ya ajak asoshi tajungshiba ka lir, ta ashiba den iba tetushi ya award agizükertemi aremzüka meranga inyakba aser pei taküm dang nungi pei wadang tejakdang südaksüba atema kanga peta agütsüogo, ta shisem.

Maneni Angh-i parnok dang Nagaland aser India ajunga nung yimjung aser terenlok

asoshi tali bendanga agütsüshitsü ayongzükja liasü.

Angh-i, jurila tetushi 30 aser unit 4 nem Appreciation Certificates agüja liasü. Tetushi agütsüba nung Governor's Gold medal 17 aser Governor's Silver medal 13 densema liasü. Tetushi agizükertem ya unit pezü nung liasü.

Iba sentong nung Col. SBB Sharma, Col. Viplove, Col Deval Dixit, R M Tripathi, officer aser kinungsütem, IGP (INT) K. Martin Pienyu, IPS, Deputy Director SIB, Kohima, Don K Jose IPS aser department balala nungi ketdangsürtemi shilem agia liasü.

Kasa mapang nung Angh-i pa senti mapang agütsüba atema Maj Gen. Vikas Lakera, IGAR(North)-i pa dang kanga pelaba lemsatsep. Paisa, hadirji taküm samatsütsü asoshi masü saka kümzüksü asoshi lir ta shia Angh dang parnoki Nagaland nung aliba nüburtem aser linük ajunga atema parnok mapa bendanga agüja inyaktsü ta tenangzükba agütsü.

KSCDL-i ayongzükja Fit India Swachhata Freedom Run sentong agiogo



October 21 nü Kohima nung Fit India Swachhata Freedom Run nung shilem agirtem tangokba noksa nung angur.

Kohima, Mongputeni/ October 21 (TYO): Kohima Smart City Development Limited (KSCDL)-i ayongzükja Honibarnü Indira Gandhi Stadium, Kohima nung 4buba 'Fit India Swachhata Freedom Run' sentong agiogo. Iba sentong ya "Swachh Bharat Swasth Bharat" omen nung ajemdaker agia liasü.

Fit India Swachhata Freedom Run ajanga, nüburtem nem fitness aser libaliro tajung angazükja beshitsü asoshi tangazükba agütsütsü aser ajungshitsü meranger, koba ajanga nüburtem temang tozük tali küma aoba, azümesenba, belemba, anxiety, tashidak amala nungi jenboa toktsütsü aser tashi, speed, endurance, coordination, flexibility, agility aser balance

amala motor abilities renlokba nung teyari agütsütsü.

Fit India Freedom Run ya, Fit Indian Movement tashi itshidaksütsü aser fitness ya taküm yimya ka kümduksütsü asoshi lisopurtem shilem agidaksütsü atema lir.

Honibarnü iba sentong ya Senior General Manager HR, KSCDL Kekhriesetuo Ziephrü-i tenzüka liasü. O jembiba mapang Ziephrü-i, sentong nung shilem agirtem nem iba sentong ayongzükja agiba nukjidong metetdaksü aser parnok ajak dang Kohima yimti mereka toktsütsü asoshi khuret abentsü aser bendanga agüja inyaktsü ajungshia liasü.

Sentong nung Youth Resources & Sports Department kübok Sports Academy nungi

kaketshirtem aser department ketdangsürtem aser coach temi shilem agia liasü. Maneni wadang balala nungi nisung 200 parnok den külemi asema liasü.

Iba sülen sentong nung shilem agirtemi physical fitness ajanga India ya anema aliba linük ka kümduksütsü aser jana ajanga alima memenendaksü kümzüka ayutsü atema tenangzükba agia liasü.

Sr. General Manager KSCDL, Kezhochole Rhetso-i, sentong nung shilem agirtem dang maneni temang arakzükja inyaksangshiba nung shilem agitsü ajungshiba den iba ajanga nisung ka health tajungba kümduksür aser anogoshi exercise agiba ajanga tashidak tamajungtem samadaksütettsü, ta ashi.

Dimapur nung mejangjaba tasü mang ka nguteta lir

Dimapur, Mongputeni/ October 21 (TYO): October 21 nü 12 ako meta Dimapur kübok fylover anasa old Over Bridge Colony nung arishi küm 35 nungi 40 tsünga asütsü ta bilemba non-local tebur ka sür aliba indang osang nüburtemi phone ajanga East PS nem metetdaksü liasü.

Osang dak ajemdaker East PS duty party iba tesemi ao aser nisungba ya koma asü aji asadanga liasü. Bushisüngdangba sülen pa asüba dak sendakba nung temelung

malemetsüsa ken o kecha sendaka mali ta ngutetogo.

Temzüng ozüng kübok tinyaktsü maparen ajak tembanga inyakba sülen tasü mang ya post-mortem examination atema District Hospital morgue-i benerogo.

Iba dak sendakba nung asüsanger kinunger aser medemertem dang East Police Station, Dimapur Officer-in-Charge (Mobile No. 7085055020) den tongteprateptsü asoshi mepeshia metetdaksüogo.

Mokokchung nung Police Commemoration Day sentong agi



Mokokchung nung Police Commemoration Day sentong agidang Superintendent of Police Mokokchung Manoj Kumar A. IPS-ia asürtem nungtem nung yangluba longzüng nung tetushi agütsüba tamaitsü narjung inoktsür salem agutsüdang tangokba noksa.

Mokokchung, Mongputeni/ October 21(TYO): India linük ajunga den külemi Mokokchung nunga Mokokchung Police-i ayongzükja New Reserve Mokokchung nung Police Commemoration Day sentong agiogo.

India nunger Police-tem shirnoki linük asoshi takum tenla aguja inyakdang takum amongba anogo nungtem nung Superintendent of Police Mokokchung Manoj Kumar A. IPS-i anir Police Officers aikati Police-temi takum tenla

agutsüba bilemteta asürtem nungtem nung yangluba longzüng nung tetushi agütsüba tamaitsü narjung kaka inokja liasü.

Tanu iba sentong nung NPTO Mokokchung, HG/CD & SRDF Mokokchung, Fire Service Mokokchung, Chuchuyimpang Village Council, Mokokchung Town Lanur Telongjem aser All Ward Mokokchung nungi lenirtem arua aden aser O.C. Women Police Station Mokokchung Wt. Imlichila ketdangsüba nung iba sentong agia liasü.

21buba ANCSU general conference Wokha nung agitsü

Kohima, Mongputeni/ October 21 (TYO): All Nagaland college Students Union (ANCSU)-i ayongzükja October 24 nungi 26 tashi Mount Tiya college, Wokha nung 21buba Biennial General Conference ayongzükja agitsü. Iba sentong ya "Perseverance" omen nung ajemdaker agitsü.

Conference ya seminar dak rangloker agitsü, kong brainstorming session, music aser art amala densema alitsü, aser sentong nung wadang balala nungi shisalen sayur aser lenirtemi shilem agitsü, ta Organising committee Convenor Dievi Yano aser Co Convenor Benjong Longchar nati sangdong ka ajanga metetdaksü.

Nagaland nung züngoksema aliba collegier 40, associate college tem aser tejaoker 1000 host asütsü asoshi ANCSU renemdar, ta parnokisa metetdaksü.


Conference nung session pezü tashi agitsü.

MLA Y Mhonbemo Humtsoe, Minister for Higher

Education & Tourism Temjen Imna Along, taoba Naga Students' Federation tir & taoba Secretary General North East Students' Organisation Senchumo NSN Lotha aser NSF tir Medovi Rhi nungeri sentong nung introductory guest, inaugural guest, theme Speaker aser valedictory guest ama shilem agitsü.

Formal session tem agiba sülen tatembangbuba anogo college kaketshirtem atema Music, Art, Poetry dak sendakba nung parnok sempet sayatsü asoshi Collegiate Nite ka ayongzükja agitsü, ta kasa sangdong ajanga metetdaksü.

Conference mapang 2023-25 tenure atema ketdangpur tasen shimtsü asoshi ANCSU General Election agitsü aser 2021-23 tenure atema tatembangbuba assembly session agitsü, kong ken o tem balala benoka sensak asemstü aser team tasenbai tejakdangi bener aotsü atema bangzüng balala yanglutsü, ta sentong ayongertemisa metetdaksü.



October 21, 2023 nü Mumbai nung aliba Y. B Chavan centre nung B.R. Ambedkar-i züluba kaket 'The Problem of Rupees: Its Origin and Its Solution' nung ajemdaker o lemtepa sentong nung NCP Tir, Sharad Pawar aser MP, Kumar Ketkar nungert tangokba noksa nung angur.

US aser UK-i India dang Vienna Convention kübok inyaktsü ajungshir

New Delhi, Mongputeni/October 21 (Agencies): Hokolbarnü Canada Ato kilonser, Justin Trudeau-i, India sorkari agiba telemtebatem ajanga linük anaprongla nung nübür million aikati timtem ajurur, ta metetdaksü.

Tang India nung Canada nung diplomatic missions kar shibangba dak sendakba nung UK sorkari, "Yimtibatem nung mangatetep bentetsü atema tongtepratepsü nungdak. India sorkari agiba telemtebatem nung onoki ai-aura makar; item telemteba ajanga Canada nung ketdangser aikati India toktsür aoer," ta metetdaksü.

Taoba ita India-i Canada dang India nung aliba Canada nung ketdangsertem ajemtsü metetdaksüba sülen Canada nung ketdangser 41-i India toktsür oadokogo.

UK-i, "1961 Vienna Convention on Diplomatic Relations nung aliba ama linük ajaki inyaktsüla. Ketdangsertem kümzüksü aser parnok nem security agütsüba maongkatem agientsü atema telok kati dang telemteba agibaji Vienna Convention nung bangzüngba alema lir," ta ashi.

US State Department-ia, Canada nung ketdangsertem aikati India toktsür aoba atema US-i tebilemtsü katsür, ta metetdaksü.

US State Department-i, "Mangatetep bentetsü atema ketdangsertem alitsü nungdaker. Onoki India sorkar dang Canada nung ketdangsertem ajema mekümdaktsütsü aser Canada nungeri bushisüngdangba nung India dang amalitepsü atema mepishiogo. India-i 1961 Vienna Convention on

Diplomatic Relations kübok inyaktsü, ta onoki imlar aser Canada diplomatic mission nung züngsemtem nem agütsüba maongkatem akhümtsübuttsü imlar," ta metetdaksü.

UK-isa India dang Canada nungeri Khalistani lenir, Nijjar tepsetba tatalokba bushisüngdangba nung yaritepsü atema maneni India ajungshir, ta metetdaksü.

Taküm June 18 nü Canada nung British Columbia kübok Surrey nung aliba Sikh cultural centre kima nisung anati Khalistani lenir, Nijjar khaseta liasü.

Canada Ato kilonser Justin Trudeau-i, Nijjar khasetba nung India-i shilem agia lir, ta tai tongloksüba sülen Canada aser India na tsüngda tesendaktep raksaogo.

Mehbooba-i lenirtem dang Gaza nung rara nokdangtsü mepishir

Srinagar, October 21 (Agencies): Honibarnü Srinagar nung Palestine nung wako amer longkak aitba sentong ka nung taoba mapang Jammu & Kashmir Chief Minister aser PDP Tir, Mehbooba Mufti den party nung inyaktertemi Israel anema yimyim ayim.

Longkak aitertemi 'Israel meyipa oadokang' aser 'Palestine toktsür oang' ta yimyim ayima liasü.

Srinagar nung aliba PDP headquarters kima longkak aitba sentong nung jembidang party Tir, Mehbooba Mufti-i alima nung lenirtem dang Gaza nung

rara nokdangtsü mepishi. PDP züngsemtemi yimti tiyongtsü nung aliba Lal Chowk tashi oa longkak aittsü tebilemba liasü saka Jammu & Kashmir Police-i parnok nokdang.

Israel-i amakdang Gaza nung tepsetba tanurtem noksa amer Mehbooba Mufti-i police gari kolaki atu. Police gari jagi la den party nung inyaktertem nokdanga liasü.

Osangbenertem den jembidang Mufti-i, "Palestine nung tim masüba mapatem atalokdar. Iba rara ya anentsü nungdak. Alimai nokdaker iba rara ya anendaktsütsüla," ta ashi.

Laisa, "Gaza nung alirtemi timtem balala ajangshiba anema onok yangi adenshia lir. Onoki UN dang meimchir temeim nung ajemdaker iba mangatetep bentetsütsü mepishir," ta ashi.

Yakünü-a Mehbooba-i, akhidang Nazi teloki Israel nung jenti tepsetba ama tang Israel-ia kasaji benshia Palestine nungert tepseter, ta aija liasü.

Laisa Muslim linüktem dang iba tatalokba ya repranga dangbo meyutsütsüla aser iba tebilemtsü bentetsü atema America ama linüktemi tiyongtsü ia inyaktsüla, ta jembia liasü.



October 21, 2023 nü New Delhi nung aluyimertem lenir, Rakesh Tikait-i AAP MP, Sanjay Singh'er kibong züngsemtem ajurudang tangokba noksa nung angur. Senotsü dak sendakba ochimashi ken o ka nung ED-i Singh pua lir.

Israel-i ozüng alema Palestine nungert li atsünger: Asaduddin Owaisi

New Delhi, October 21 (Agencies): Honibarnü All India Majlis-e-Ittehadul Muslimeen (AIMIM) Tir, Asaduddin Owaisi-i, tesüiba küm 80 tashi Israel-i ozüng alema Palestine nungert li atsünger, ta tai tongloksü.

Tang Hamas telok aser Israel nungert sepaitem tsüngda raraba mapang nung Owaisi-i, "Tesüiba küm 80 tashi Israel-i Palestine nungert li atsünger," ta ashi.

Iba rara ajanga Israel aser Gaza na nung tang tashi nung nisung 5,600 shi süogo.

Paisa, "Ni asen linük (India) nung nübürtem dang ya shiner-Mahatma Gandhi-i England ya English nungert lima aser France ya French nungert lima, yamaji Palestine ya Arab nungert lima ta jembio," ta metetdaksü.

Paisa, "Akhidang nungi India-i mapang ajak nung Palestine nungert pusema aruogo. Palestine ya

nüchiso anguba linük ka asütsüla ta asenok tangatetba lir," ta ashi.

Israel aser Gaza na tsüngda rara tenzükba sülen Owaisi-i Palestine aser nem tenüngsang agütsüba den külemi rara aija liasü.

Yirusalem nung aliba Al-Aq?? Mosque amakba dak sendakba nung Owaisi-i X ajanga, "GAZA nungert teka, Falasteen Zindabad. Murdabaad rara (talisa Israel mesüra tanga telok/organisation). Masjid e Aqsa Aabad Rahe," ta metetdaksü.

Rara tenzükba sülen hopta ka shi lir osangbener den jembidang Owaisi-i, "Gaza nung nütüng lakh 21 dang lir aser iba nungjagi nütüng lakh 10 bo talidak makai kümogo. Alimai ola madoker. Küm 70 tashi Israel-i ali atsünga agir. Ali atsünga agibaji nenoki mangur aser nübürtem anema inyakba mapatemji nenoki mangur," ta jembia liasü.



October 21, 2023 nü Sriharikota nung aliba Satish Dhawan Space Station nungi ISRO indang Mission Gaganyaan tendanga khakettsüba noksa nung angur.

Tamil Nadu CM Stalin-i PM Modi dang Caste census agitsü mepishi

Chennai, October 21 (Agencies): Honibarnü Tamil Nadu Chief Minister, M K Stalin-i Ato kilonser, Narendra Modi dang linük census agidang caste census-a züngoktsü mepishi.

Taruba census agidang Caste census densema agira ibaji ajanga kanga tekübok jenjang nung alirtem kanga ajangzüksü aser nübür ajak züngoka linük tashi taitba akümtsü, ta Stalin-i shidi ka ajanga Ato kilonser, Modi dang ashi.

Linük census agidang caste census densema agiba ajanga loktiliba nung nübür telemsa balala osang tejangja metettsü aser ibaji ajanga loktiliba-rongsenketsüng jenjang junga metettsü, ta Tamil Nadu Chief Minister-i metetdaksü.

"Ibaji ajanga kuli nung ajemdaker asalentong yanglutettsü aser ibaji ajanga ajak kasa züngshia terenlok nung züngsemba tsütsü yaritsü. Linük census den külemi caste census agiba ajanga osang bendenba nung yariba dang masü saka senotsü-a aika kümzüksü," ta Stalin-i ashi.

"Anungji caste census agitsü

atema Centre sorkari tangsa sentong yanglua renemshitsüla," ta Chief Minister-i shidi nungji shia lir.

Chief minister-i iba shidi ya October 20, 2023 nü zülua liasü.

Linük census ya küm ter shia khen agir aser 2021 küm nunga census agitsü liasü saka coronavirus wara ajanga thinenba sülen tang tashi census magir.

Stalin-i, caste dak sendakba osang tejangja bendenba ajanga temsüa alirtem nisung crore aika tajangzük angutsü, anungji memeno census agitsüla, ta ashi.

Bihar densema state karibo caste census agia osang-a sangdongogo aser state karia caste census agitsü sangdongogo.

Taküm June ita nung Bihar state sorkari caste census agiba report metetdakja liasü.

State tem sasep nung caste census agibaji junger, ajisüaka linük tesem ajaklen iba census agia medemdbangbasa tajungba asütsü, ta Stalin-i ashi.

Congress party densema opposition party karia Bihar nung agiba ama linük tesem ajaklen caste census agitsü akhanger.



TIR YIMYIM YIMOBILEM (EDITORIAL)

DIMAPUR AMUNGNÜ, MONGPUTENI (OCTOBER) 22, 2023

Tsüngrem medeni takok anguba

Alima nung nisungtemi anguba takok ajak ya Tsüngrem nungibo masü. Aji oda, Sayutsünger tapu 8 tekong 14 nung yamai ashir, "oda temeshipur nisung dak tamajung inyaker dak ama ataloker aser ano nisung tamajunger dak temeshi pur dak ataloker ama ataloker." Tetezü alima nung asenoki temeshipurtema ta bilemba purtem kanga timtema angr saka nisung tamajung shirnoki nisung tepseter, auyar aser rakzükratemer parnokjiang temeshi pur nem moatsür ama jangratema azükarua aliba angr. Aji oda, asenoki aseni inyakba aser aginüba mapatem nung Tsüngrem dang nungi takok aser tajangzükjiang tuluba kümdaktsüra, atangji takok angutsü aser tajangzuka alitsü. Ajisüaka, item takok aser tajangzüktemji Tsüngrem maden anguba takoktem asütsü. Nisung asoshi shitak mesükba lenmang ka lir saka tatembangji tasüba ta asüba temoatsü aser takoktemji itemji asütsüa akok. Iba jagi kasa Sayutsünger tapu nung ashir, "oda Tsüngrem tsübuba pur shiri Pa dang tsübur, parnok jungküm saka tamajunger asoshi asaktsü." Ibaji alima nung Tsüngrem tsüburtem asoshi anisüngzük o aser Tsüngrem metsüburtem atema tekümdangtsü o asütsü. Atangji, tanü asen lima nung nisung aika tiyazü jembia pei mapa nung takok angr, rakzükratema takar akümer aser tashiyim agi yimten mapa nung takok angr. Item takok ajakji asenoki Tsüngremi moatsüba takoka ta bilemer, anungji tamajung mapa inyaker takok anguba takoktem ajak asoshi asenoki Tsüngrem nem tenüngsang agütsür. Nisung kar tepseter mesüra yirutsür takok anguba, nisung kar temulung jashidaktsür takar akümba, ochimashi mapa kar ajanga takok angubatem asoshi Tsüngrem nem tenüngsang agüja sarasadembaji Pai agizüktsü asü. Tsüngrem medeni takok anguba nung lendong lir ta meteterem alima tanishirtem rongnung Mosa-a ka liasü. Anungji, Tsüngremi kodang Pa dang Egypt lima nungi Israel nungertem aniteta anir aotsü nungloktsü, Mosai Tsüngrem dang ashi, "item nübertem anir oang ta nai kü dang ashir, ajisüaka kü den shiba yoktsü ajibo nai kü dang mashir....nü tatenba onok den marura, onok yang nungi anir touma." Anitet 33:12 & 15." Kibubai langzü, Kü tatenba nü den aotsü," Anitet 33:14. Asen den Tsüngrem lir ta züngzünga meteter inyakba aser takok angubaji jangratemtsüka lir. Tanü asenok anema alitsüa akok mesüra mapa ajak nung takok aser tajangzuka ngua alitsü akok, ajisüaka item takok aser tajangzüktemji Tsüngrem adenba agi anguba masütsüa akok. Aji oda, asenok dangi aruba temoatsütemji kong nungi aruar, itemji jangjatsübaji kanga tongtibang lir. Ashiko, nai Tsüngrem masü saka rongsen arishiba agi tajangzük anguba asütsüa akok mesüra Tsüngremi mulungba masü saka nai mulungbalen alima konang bushiba agi takok angu asütsüa akok. Ajisüaka, Mosai ashiba ama, asen jakdang aser asen meketa aliba tsükchirtem madak takok nguyonga oaka mesüra mamatzü aser ninang mojitsü talubosa alidak Kanan lima tashiji tonga oaka, Tsüngrem tatenba medenra amajok ta asenoki metettsübaji kanga tongtibang lir. Tsüngrem medeni anguba takokji takok masü, ibaji asen tenük agi ngua alima tsüngdang samatsüba mapatem lir. Tanü asenoki nisung tamajungertem aika rongsen aser alima yimten tashi madak jangratema aliba angutsü, ajisüaka Tsüngrem medeni anguba rongsen aser tajangzüktem jagi asenok dangi memenui teraksa aser tebilemstü khuret tulu bener arutsü. Atangji, takok aser temoatsü ajakji Kibuba nungi arur, anungji asenoki Pa dang meshir. Aji oda, tanü asen akaba rongsen, takok aser maongka ajak ya shitakba Tsüngremi agütsüba temoatsü asü masü ta reprangdangtsübaji kanga tongtibang asütsü. Asen kidang Tsüngremi memulungba rongsen ayuba agi aser Tsüngremi memulungba tashi amshiba agi tarutsü senmangertem kangshidaktsütsü agibo, tanü Tsüngremi mulungba inyakba temoatsü agi tarutsü senmangertem anisüngzuka lidaktsü tajungba asütsü.

OLEMSABANG

Anemsü agi asangba dang nungibo ochishia arrtsüba tajungba

~ L. Kika Pongener.

Asen mimchir aikati, o tanang agi sanga, tushia jembiba kanga anganur, aser anemsü agi o tajung jembiba nung kanga pelaseter. Majunga ta metetsümong-aka anemsü agi junger...ta sanga jembibaji, aikati kanga anganur aser akoseta pelaseter. Ano nisung aikati indangindanga metongshitsüba aser ochishia arrtsüba o-jibo kangasa manganur. Shirnoki ochishia arrtsür aser indangindanga metongshitsür parnokjibo aikati kanga sempar. Tanü asen loktiliba nunga lennir aikati ochishia arrtsüba aser indangindanga metongshitsüba maginur aser iba amala tenzükerjibo lokti nunga metenzükdaktsünur. Atangji, tanü asenok aliba putu ya, ochishir aser indangingdanga jembir sempaba aser maginuba lima ka küma odagi. Laishiba nung züngdangra... "Temeli agi mesüzüka nanga jembir dang nungi; Nisung arrtsüri tesülen maongka tali angutsü" (A.Shin-28:23). Tsüngrem o-i ashibaji shisadangra, meshitak sernung, majung sernung aser aibelena lir sernung, odi-odia/indangindanga meshiteti, meyipar anemsü agi, o tanang jembia sanga/tushia jembiba dang nungibo, indangindanga yabo majunga, yabo melenshitsüla-a...ta arrtsüa metongshitsüra, tesülen maongka tali angutsü ta ashibaji...koda jangratemtsü o lir.

Nisung aikati pei tajangzük kar ngunudang/aginudang, aser pei taginuba nukjidong kar ataloknudang, anemsü agi mesüzüka o tanang jembir, saka iba ama nisung jagi kopi meli-i pa/la anema nungsen jembitsü. Pei taginuba kar ataloknudang, metetsümonga tiyazü agi sanga jembir dang ashi, pa/la jagia majunga tabo meteta dang lir. Anungji pa/la taginuba nukjidongji ataloker külenbo, sensa-masaa/atalaa menütsütsü. Tsüngrem o-i ashiba amaji, mesüzüka nanga jembir dang nungibo indangindanga arrtsüba tajungba, parnoki tesülen maongka tali angutsü. Anungji asen lima aser asen lokti jungnura, asen lima aser asen telok tejakleni onura, asenoki ochi mimbanga yur kati ka tenung sangtepa, tushitepa, jembiba yimya ya endokdi/melenshidi. Jokorla, asenok tang nungibo, kati ka odi-odia metongshiteptsü tenzükdü. Lennir nungi tenzüker nütsüng nübur tanitaker tashi, kati ka arrtsüa metongshitepdi, aser arrtsüa metongshipaji asenok ajaki anganudi. Küm aika asenok tenung tang sangtepa aruba agi, asen lima aser asen lokti tesüleni talangka oadokogo, aser kanga mejungi raksaogo.

Akhi putu nung mangko bushitepba mapang, yim-maker nungi kümzüktsü atema, pei pei among-sungküm shibanger, kati ka den metetpelaa, tongtepratepa, jungtepa, sendaktepa meliteti lia aruba agi, alimaji tammang tia nung, nübur tangatetba ajunga kanga mesümesür (Narrow minded), aser pei-i tilaka metetbaji, alima ajunga akok amai bilema litepa aruogo. Aji oda, iba tensa tia nung aliba jagi kati ka ajungshitepa, metongshitepa, arrtsütepa alitsü mekoki, kati ka tsübutepa litepba agi, alimaji tajung asü (?) Mesüra tamajung asü (?)...Kecha memeteti lia aruogo. Ajisuaka, kanga tia kaa, tanübo asenoka alima tashitemetet renloka aoba den jangyu medema, 'Social Media' sabang akaba agi, kati ka metongshiteptsüsa maongka anguba ya asenok ajaki kanga pelaseta agidi. Atangji, tanübo Social media ajanga asenok tsüngda nung kati ka meteta, kati ka angateta, kati ka ajungshitepa, kati ka metongshitepa alitsüsa sabang (Platform) tajung akaba ya koda jangratemtsüka lir. Asenok ajak mimchir dang asünung, lennir-a suang, nütsüng-nübura suang, ashiko, tashimait karbo alitsü akok, mesüra mapang kar nungbo metokmeper-ia inyaksemtsü sudi. Anungji asenok ajaki pei tashimait angateta, kati ka metongshitepbaji angalemtepa lira, asen lima tajungba küma melenshitsü aser tejakleni aotsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir

CBCMHK Men Fellowship Dept-i Fathers Camp ayonga agidar



October 20, 2023 nikongdang Chakhesang Baptist Church Ministers' Hill, Kohima (CBCMHK) kübok Men Fellowship Department-i ayongzükba Fathers Camp tetenzük sentong nung CBCMHK pastor, Rev. Dr. Wepre Mero-i jembidng tangokba noksa nung angur.

Viswema (Kohima), October 21 (TYO): Chakhesang Baptist Church Ministers' Hill, Kohima (CBCMHK) kübok Men Fellowship Department-i ayongzükba Hokolbar nungi tenzükba John Govt Higher Secondary School, Hostel, Viswema nung anogo asemnü Fathers Camp agidar; iba sentong ya Amongnü tembangsü.

"Kibuba Yisu dak amangang aser na kümzüksü- na aser ner kibong kümzüksü" (Tenyartem Mapa 16:31) omen nung ajemdaker Fathers Camp ya ayongzük.

Camp Media Coordinator, Kuzhovesa Soho-i sangdong ka ajanga, Hokolbar nikongdang 4:00 ako nung metetpelatepa sentong tenzük aser CBCMHK pastor, Rev. Dr. Wepre Mero-i Camp omen nung ajemdaker Tsüngrem O jembia liasü.

Rev. Mero-i, "Tatem maka tekümtet angutsü atema tongtibangtibaji Khrista tesayuba nung ajemdaker kibong

yangertsüla," ta ashi. Paisa tebutem ajak dang tesülen meyipa reprangshitsü aser apuani nati longjemer telemtetba agia kibong mission inyaksü ayongzük.

Chichiba tamang tanela yangertsü nungdak, ta shia Rev. Mero-i, nisung ka tamang ajanga tatem maka taküm alangzük, kechiyong tangar ka tamang ajanga tekümtet mangutsü, ta ashi.

Nü tamang ajanga nai tekümtet angutsü, anungji tebutemi pei nendaka pei tamang jenjang ajungketsüla, ta paisa ayongzük.

"Iba camp mapang nung tebutemi chichia telemtetba agitsüla, ibaji ajanga kibongtem aser loktiliba nung temelenshi adoktsü," ta pai ashi.

Iba camp atema tebutem 250-i tenüing agüja liasü; tebutem rongnung office ketdangpurtem, camp officials aser sarasadem nung walunirtem densema lir.

Honibarnü tanünübuba

anogo nung Chakhesang Baptist Church Ministers' Hill, Kohima (CBCMHK) nung senior pastor, Rev. Dr. Vevo Phesao-i jembia liasü.

"Temoatsüba tebu ka" onük nung ajemdaker jembidng Rev. Vevo-i, temoatsüba tebu kati pei kibong atema tekümtet agütsür saka atakatamba tebu kati pei kibong ajak raksatsür, ta shia tebutem dang kibong ajakji tebu ket nung lir, anungji tebutem kanga küm dangtsüla, ta ashi.

"Tebu tajung kati teraksa kibong ka aser loktiliba yanglushir. Pei kidangi ao tashi nungbo tebutemi telemtetba tajung agitsüla aser tangatetba tajung agi telemteta agia ibaji benshitsu," ta paisa ayongzük.

Anogo asemnü camp ya ajanga kibongtem aika azükarutsü, ta paisa ashi.

Honibarnü mezüngbuba Resource session nung Higher Education Dy. Director, Dr. Medongoi Rhakho-i 'shisaliok aser kibong rongsenketzüng' onük jembia liasü.

ANO GO ABEN TSÜNGREM DEN

KARA SAMABA TAKÜM

"Ayi akonger; naro azülar; saka Tsüngrem O-bo teti alitsü" *Isaia 40:8.*

Mapang tatsüka ogo, asayadak (Playground) nungji ayi meia kanga toburjunga kima nung nenyana-nyena ayi agi sünga liasü. Saka kodang anü tesashi apu aser tsünglu maru ayi ajak sümar temeruso kümatok, ayi to kongatok aser ayidak aliba topur ajung to samatok. Isaia-i ashibaji ya lir, "Ayi akonger, naro azülar, saka Tsüngrem O teti alitsü". Mathi 24:35, nung Yisui ashiba yamai zülua lir, "Anüing aser ali süitema aotsü, saka kü O süitema maotsü."

Yamaji tsüngküm mongpua ka sülen ka ta, mapangtemji süitema aor. Aser ibajagi asen taküm arishi koda tatsü aser telemtet ka dang lir ta sayur. Aji oda süaka, aseni telemtet aser tatembang makaba Tsüngrem shibai pa dak amanger shia nem tatem maka taküm agütsür, Paji dang tetenzük aser tatembangji lir. Pa ajak nung dena lir, ajak yanglusang, ajak metetsang Pa asen Tsüngrem lir. I Kor. 15:54, nung yamai zülua lir, saka kodang iba tesamaba mesamaba kümer lidir, aser iba tasüba masüba kümer lidir, idangji iba zülua aliba o ataloktsü tasüba takokba nung meyokogo, O tasüba, ne temedakba kong ali?

America nunger missionary pilot, Ryan Koher chiokadokogo



Missionary pilot, Ryan Koher den pa kinüngtsü aser tanurtem noksa nung angur.

October 21, 2023: Yaküm küm tatembanglen Mozambique linük nung apuba America nunger missionary pilot ka tawa chiokogo.

Missionary pilot, Ryan Koher ya Khristan charity, Mission Aviation Fellowship (MAF) nung pilot ka ama tenzük. Yaküm November 4 nü pa den South Africa nunger ana- Willem du Plessis aser Eric Dry nunger pua liasü.

Ryan-i Mozambique nung telungpurtem pusemer, ta pa nem tai tonglokja apuba sülen jail nung puoka liasü.

Tawa court kati par asemprong linük nungi aotsü mela aser parnok nem passport meyipa agüjang, ta tetuyuba agüja liasü.

Tan hopta Ryan Koher aser pa kinüngtsü Annabel na den tanur ana Idaho nung aliba Boise airport tonga aoba sülen

kinüngertem den mongdar. Pa chiokyonga pa anema maneni bushisüng dangtsü, ta osang angazük.

Ryan Koher ya MAF kübok Mozambican partner Ambassador Aviation Ltd. (AAL) den missionary pilot inyaker. Pai tayimtsü ajanga vitamins aser tanga supplies balala Montepuez district nung Arogoi ketdangsuba orphanages-i bener otsütsü lia November 4 nü apu.

South Africa nunger anajia supplies ji bener oa Koher indang tayimtsü nung khu oshikettsü lia police-i pua liasü.

Yaküm MAF Tir aser CEO, David Holsten-i phone ajanga Mozambique nung ketdangsertem dang Khristmas matongdangsa Kohler chioka pa kinüngtsü aser jabaso ana dangi odakjang, ta mepishia liasü.

Billy Graham Evangelistic Association-i Berlin Congress ayongzük



October 21, 2023: Billy Graham Evangelistic Association (BGEA)-i Europe tesem ajaklen asentenshir Khrista osangtajung proktsü atema Europe tesem balala nungi Khristan lenirtem ayongzükba tongtibang sentong ka agitsü atema renemdar.

'European Congress on Evangelism' sentong ya Germany yimtiba, Berlin nung 2025 küm May 27 nungi May 30 tashi agitsü; iba sentong nung Europe tesem balala nungi Khristan lenirtem 1,000 dak tema adentsü imlar.

1966 küm Berlin nung

mezüngbuba 'World Congress on Evangelism' agia liasü, 1974 küm Lausanne nung iba conference agi aser 1983, 1986, 2000 kümtem nung Amsterdam nung 'Evangelism Congresses' agia liasü.

"2025 küm ayongzükba Berlin Congress nungji Khristan lenirtemi asentenshir tasü itta Khrista osangtajung proktsü atema telemtetba agitsü imlar," ta BGEA-i metetdaksü.

Sayutsüingir, Ulrich Parzany-i, "Tang ama tayongzükba jenti aliba tensa ka nung Khristantem aser Arogotemi longjemer Europe tesem ajaklen Khrista

osangtajung sangdongtsüla," ta ashi.

Paisa, "Taruba European Congress on Evangelism nung adentsü ni yongyar aser iba sentong ajanga asentenshir tejangraba nung Khrista osangtajung sangdongtsü imlar," ta ashi.

Churches in Communities International Tir, Dr Hugh Osgood-i, "Europe nung Arogoi asentenshir nokdaksü nungdak. 'European Congress on Evangelism' ajanga lenirtem ajungmesotsü, tashi itshtitsü aser osangtajung nung tamang katetba ajanga asenoki iba wadang ya inyaktettsü. Tsüngrem yimli ajanga asenok longjemtsü atema iba maongka ya asenoki agitsüla," ta ashi.

Tang tashi nungbo iba sentong nung o jembitsürpurtem mejangja saka omenjibo Rome 1:16 asütsü; iba Lai ajanga osangtajung atema tamangertemi aakmesen masütsü ajungshir.

AO OSHI ANGAZÜKDAK:
TANÜ ANGAZÜKTSÜBA OJANG



Soreptangrep

(adv) tanur tebur agi mesosemba agi kin amaba (extinction of clan),

* Tanü putu nung kin aika soreptangreptsüsa ataloker.

Sarir

(n) tsükchir, arür (enemy)

* Sarir kolak bener arur nem tetsürtemi ken tajung tenloksü.

OLONG PAITEP # 6673

	1			2			3		4
5							6		
7			8						
							9		
		10							
11									12
					13				
					14				
15									

TIPIEN

- 1. Balaka - (5)
- 6. Aika shirangba - (4)
- 7. Tar tatsü - (6)
- 9. Nenü'er jabaso - (4)
- 10. Sen latetsüba - (7)
- 11. Tangar kübok alir - (4)
- 14. Lon nung inokba - (6)
- 15. Tzü ayimdak - (4)
- 16. Ajok - (5)

LANGTSÜNGLEN

- 2. Hai sür inyak - (4)
- 3. Aor tenüing ka - (6)
- 4. Ali telungi talangka lur - (5)
- 5. Tebang kenyongi mazüoker - (4)
- 8. Ken atema anenzükertem - (5)
- 9. Toktepa noktak - (5)
- 10. Sen - (6)
- 11. Benjong agi - (5)
- 12. Telung nung rizünga ayu - (4)
- 13. Tebang nung enok - (4)

OLONG PAITEP # 6672 TELANGZÜBA

TIPIEN :

- 1. Tenük, 6. Temko, 7. Agima,
- 9. Tila, 11. Kiyir, 14. Ajet,
- 15. Akong, 18. Anasa, 19. Penzü.

LANGTSÜNGLEN :

- 1. Tajak, 2. Nati, 3. Kima, 4. Ata,
- 5. Okila, 8. Maket, 9. Tarak,
- 10. Oya, 12. Ojang, 13. Aginü,
- 15. Asep, 16. Omen, 17. Tal

NAI-A YA METETTER MA

May 1996 küm Asür Atal Bihari Vajpayee, India Prime Minister menden nung anogo 13 nü dang inyak, koba Indian nunger otsü nung ibaji tatsütiba Prime Minister inyakba lir.



Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülür, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

6 Buba Supongmeren Memorial Volleyball Trophy

Venue: Molungkimong, Dist., Mokokchung

Date: 9th - 10th January, 2024

Mapang: 9:00 AM

Prizes:

- Champion - Rs. 70,000/- with trophy and certificate.
- Runner Up - Rs. 50,000/- with trophy and certificate.
- 3rd Place - Rs. 30,000/- with certificate.
- 4th place - Rs. 10,000/-.

Individual Prizes:

Best Spiker - Rs. 2000/-, Best Setter - Rs. 2000/-, Best Discipline Team etc.

Entry Fee Rs. 3000 per team. Last date for submission of forms: 6th January 2024.

Sd/-

P. Imti Aier, Convenor
9383014469

Sd/-

Maki Ozukum, Secretary
7005700719

Sikkim nung tourist gari driver nem Rs 20,000 cheque agütsü

Gangtok, October 21, 2023

(Agencies): North Sikkim nung tzümetsüing ajanga anendaka aliba tourist gari driver shia nem Sikkim Chief Minister Prem Singh Tamang-i Rs 20,000 cheque agütsüogo.

October 4 nü Testa ayong tzümetsüing lendong atalokba sülen Lachen, Lachung aser Chungthang nung tourist gari

driver 223 tashi anendaka liasü. Hokolbarnü CM Tamang-i driver nem cheque lema agütsüdag 'state sorkari teyari agütsüba ajanga driver tem indang khuret ajema akümtsü imlar' ta pai ashi.

Arunachal Pradesh Chief Minister Pema Khandu-i Sikkim Chief Minister's Relief Fund (CMRF) nem Rs 2 crore tenla

agütsü ta paisa ashi.

CM Tamang-isa Pema Khandu aser Meghalaya CM Conrad Sangma nati Sikkim state yariba atema pelaba metetdaksü.

Tzümetsüing lendong mapang Chief Minister's Relief Fund (CMRF) nem tenla agütsüba kija aser telok ajak dang kanga pelar ta Sikkim CM-isa ashi.

Mizoram elections nung Congress-i onük asem nangzüker

Aizawl, October 21, 2023

(Agencies): Mizoram nung assembly election atema Congress-i onük asem nangzükerogo.

Züngsem 40 agi akümba Mizoram legislative assembly election November 7 nü agütsü lir.

Congress-i Mizoram election jakdang onük asem nangzükbaji old age pension Rs 2000 agütsütsü, LPG cylinders jenjang Rs 750 akümtsü aser entrepreneurs tashi itdaksütsüba lir.

November 7 election atema tetsür 16 dena candidate 174-i tenüing agütsüogo ta Honibarnü election ktdangürtemi ashi.

Mizo National Front (MNF), Zoram People's Movement (ZPM) aser Congress nungi candidate ajaki nomination

papers agütsüogo. Party asemprongi candidate 40 tenüing agütsüogo, ta ktdangürtemisa metetdaksü.

Candidate tem rongnung tang teinyakdak MNF MLA 25 dena lir aser ZPM-ia MLA 6 tenüing agütsüogo.

BJP candidate 23 aser Aam Aadmi Party (AAP) 4 den independent candidate 27-ia nominations paper agütsüogo.

MNF, ZPM aser Congress nungi tetsür candidate anana aser BJP nungi asem lir.

Maneni tetsür candidate 7-i independent ama tokteper aser iba nungi tetsür ana- Lalruatfeli Hlawndo o Lalramdingnheti nati constituency anana nung tenüing agütsüogo.

Mizoram nung political party tem, arogotem, civil society

organisations aser kaketshir teloktemi Election Commission dang counting date melenshitsü atema ayongzükerogo saka tang tashi ECI nungi osang kecha mali.

Mizoram nütsüing yongsük 87% tema Khristan lir aser iba jagi Deobar nungbo votes mazüingtsüla ta parnoki ashir.

Tetsür 4,38,925 dena vote enoktsür nisung 8,56,868-i assembly election nung shilem agütsü.

November 2018 assembly election nung MNF-i menden 26, ZPM-i menden 8, Congress-i menden 5 aser BJP-i menden 1 nung takok ngua liasü. Iba sülen assembly by-election ana agidang MNF-i ZPM madak takok ngua parnok MLA 28 aküm.

Tripura police-i Special Task Force tentetogo: CM Manik Saha

Agartala, October 21, 2023

(Agencies): Tripura Police-i ozüing alema inyaksangshir aser syndicates azüoktsü atema 'Special Task Force' ka tentetogo ta Tripura Chief Minister Prof. Dr. Manik Saha-i ashi.

"Tripura Police-i nübortem kümka ayutsü atema mapa

inyaka arur. Parnoki aonung anüingdang melii sensotem kümzüka ayur. Tripura nung criminal groups aser syndicates azüoktsü atema Crime Branch-i 'Special Task Force' ka tentetogo" ta pai ashi.

Manoranjan Debbarma Smriti Stadium nung Police

Commemoration Day amongdang CM Saha-i iba osang metetdaksü.

"Police-i nübortem khuret angar aser itemji koktettsü atema nendaka inyaker. State sorkari transparent policy nung inyaker. Anungji maparen ajak tashishitsü melii inyaksü" ta paisa ashi.

Manipur nung Rs 92.37 crore jenjang kozüjang apu



Imphal, October 21, 2023

(Agencies): Assam Rifles sepaitemi Manipur nung Rs 92.37 crores alangba kozüjang puogo.

Indo-Myanmar arrtsü anasa aliba Namlee aser Wanglee yimtsüngtem nung mita aodang

AR sepaitemi bosta 13,365 nung kozüjang bena aliba apu.

Parnoki gari ka sot aser iba temeket mita repringdang ozüing alema shibelenba kozüjang aika angu. Kozüjangji regional markets nung Rs 92.37

crores shi alang liasü ta asadangtetogo.

Iba dak sendakba nung kozüjang shibelener ka apu aser pa dang asüingdangya asüidang ano kozüjang aika miima yua aliba ngutet.

Israel-i lisopurtem dang Egypt aser Jordan takaratiba nung toktsütsü ashi

Jerusalem, Mongputeni/October 21 (Agencies): Israel-i lisopurtem dang tangsa Egypt aser Jordan toktsütsü aser linük temeket nung aliba linüktem-i maotsü asoshi tetuyuba agütsüogo. Gaza nung rara ajanga tensa mejungi kuma aoba mapang ka nung iba tetuyuba agütsüogo. "Israel indang National Security Council-i Egypt (Sinai densema) aser Jordan na atema travel warnings lever 4buba (high threat) agütsüogo. Item linüktemi maotsü aser item linüktem nung alirtem dang takokba tashi takaratiba nung toktsütsü tetuyuba agütsür," ta linük National Security Council-i Honibarnü sangdong ka ajanga metetdaksü.

Parnok-isa, Morocco atema threat level 3 agütsüogo aser Israel nungertem dang nungdak makaba nung senzusenpong masütsü metetdaksüogo.

Local media sangdong balala ajanga ashiba agi, Hamasa puri October 7 nü Israel amakba sülen tenzükba rara dak sendakba nung meita adoka alirtemi Israel nungertem dak rangloker inyaksangshitsü akok ta tsübu bilemba ajanga council-i iba tetuyuba agütsüogo.

Hopta ana tashi anung ajanga Gaza maka nisung 4100 dak tema tepsetba sülen Israel tang Gaza amaktsü asoshi renemba mapang ka lir. Kasa mapang nung Israel nunga nisung 1400 shi tepsetogo.

"Rara maneni aoba ajanga Israel anema tawa linük balala nung longkak aita aser talisa Middle East nung Arab linüktem

nung kanga sashia longkak aitba den Israel nung anema inyaksangshir aser Jewish temaitsütem mezüngmeshia amshir," ta kasa sangdong ajanga metetdaksü.

Israel-i lispourtem dang Turkey toktsütsü asoshi tetuyuba agütsüba den iba linük nungi diplomat tem meyipa anir aruba sülen tang iba tetuyuba agütsüogo.

Kasa sangdong ajangsa Israel nung dang Turkey, United Arab Emirates aser Bahrain densema Arab linktem nung manenzüktsü tetuyuba agütsüba den Malaysia, Bangladesh, Indonesia aser Maldives-ia maotsü atema tetuyuba agütsüogo.

Kasa mapang nung Israel-i longbanger aliba tesemtem atema kanga dang nungdaka aliba chiyongtsü, mozü aser tziü tera bener otsütsü atema Gaza aser Egypt na tsüngda arrtsü lapoktsüogo.

Teyari agütsütsü asoshi oset balala bener tata gari 20 Honibarnü Egypt nungi Gaza Strip-i iogo. Garitem nung mozü aser chiyongtsü densema lir, ta Hamas-i sangdong ka ajanga metetdaksü.

Gaza-i aitsü atema tenüngdakba oset tone 3000 shi bener tata gari 200 dak tema arrtsü anasa anogo aika anendena lir.

UN indang emergency relief coordinator Martin Griffiths-i, teyari oset balala bener yokba pelashishia agizükogo aser ashiba agi, Gaza nung teyari agütsüba inyakyim takokba tashi takaratiba nung tenzükshitsü atema ken o dak

sendaka alirtem den anogo aika kanga meranga sensakasemba sülen tang takok ngutetogo.

"Gaza nung alirtem nem teküzmükba kübok kecha tetsükdaksü makai chiyongtsü, tziü, mozü aser totziü densema tenüngdakba osettem tanü nungi tenzuka maneni agütsüyonga aotsü ta temulung lema bilemer," ta pai ashi.

Israel-i, Honibarnü Egypt nungi Gaza-i bener aoba osettem rongnung totziü bener aotsüba densema mali ta aiben shiogo.

Iba ya Gaza nung alirtem aser tenüngdakba service agüja aliba relief agency tem atema tetsükdaksü tulu lir, kechiyong totziü ya tziü atsütsü aser mozüki amala tongtibang facility tem inyaksangshitsü atema power generator tem amshitsü asoshi kanga tongtibang lir.

Iba tesem nung alirtem yimya agi tziü amshitsü asoshi tatanaang ayur. Totziü melira tziü bener aotsü atema garitem nung tziü metadentetsü mesüra tziü matsütetsü. Taoba Deobarnü totziü tematokba ajanga Gaza nung tatembangbuba tziüym tziü asüngtetba plant shibangogo.

Maneni Gaza nung mozüki aika shibangogo aser kar dang inyaksangshidar, saka item mozükitema totziü tagimar dang lir.

Totziü medeni incubator tem nung aliba kinü tanurtem densema shirangertem meyrejang aika taküm lendongbang nung lir. Doctor temi ashiba agi, tezüng agi timtemertem aser cancer agi shirangertem amala shirangertem aika tasü aser taküm na tsüngda lir.

Asür Moakumzuk sür küm ka ajungba Menungra bilemteter



TASÜBA ANOGO 22-10-22

"Tang nungi shirnok Kibuba nung asür, parnok temaotsüba; au, parnok pei bilemba nungi anisüngzükdakjang; kechiyong parnok mapa parnok den anidaker ta tanülai ashir" Jungkai Adokba 14:13

Na menungra bilemteter aser teti bilemtettsü. Na onok mulung nung teti alir aser tanaben majurutep tashi onok den jajatsü aser onok taküm tepeyong len sayutsü atema idakji dang na alitsü.

~ Temeim Kinungtsü aser Kinungertem.

Taoba Pakistan PM Nawaz Sharif kidangi meyipa aruogo


Islamabad, Mongputeni/October 21 (Agencies): Pakistan Muslim League-Nawaz (PML-N) tekolakba aser taoba PM Nawaz Sharif küm pezü sülen Honibarnü Pakistan tongogo.

Pa Honibarnü 'Umeed-e-Pakistan' tayimtsü nung Islamabad ariport tonga aru aser PML-N züngsemtemi parnok lenir pelashishia agizüka liasü, shiba lenisüba nung party pur taruba election nung tokteptsü aser pa Ato Kilonser akümtsü imlar, ta GeoTV sangdong ka ajanga metetdaksü.

Nawaz agizükba telok nung taoba finance minister Ishaq Dar-a densema liasü.

"Linük tebilemtsü bentettsü atema onok temsüa lir. Pakistan nung tensa kanga mejungi lir aser iba ya shisabulutsüka," ta Dubai nungi maru tsüngda Nawaz Sharif-i ashi.

Taoba Ato Kilonser shiba Avenfield, Al-Azizia aser Toshakhana ken o nung aija lir, pai mezüngbuba ken o ana nung protective bail agizükogo aser tasembuba ken o nung taitok



Nawaz Sharif (File photo)

agütsüogo.

"Tanü ya ni asoshi anogo tulutiba ka lir. Taoba küm 24 tashi Nawaz Sharif-i ajangshiba tejashi aser tashiba ya medemangtsü makok aser aser kodanga manepsüba zübu kar lir. Tsüngremi mulungba süra tanü Nawaz Sharif temaba jenjangi tanaben atuba Pakistan-i angutsü," ta PML-N lenir tejen aser Nawaz Sharif'er jalai X sabang ajanga lemsatep.

Sharif tenu aser taoba Pakistan PM Shehbaz Sharif-ia X ajanga pa pelashishia agizükogo. "Kü lenir Nawaz Sharif tanü nenok den longjemtsü. Pa iba linük

lemdangtsü atema masü saka longjemdaksütsü atema arur. Pa nüburtem yongtsü nung tesempatep masü saka temeim proktsü atema arua. Pa party mesüra lokti kar atema hadir ka ama masü saka nenok ajak tajangzük akaba lisopur kaka kümdaksütsü atema arur. Pa Pakistan maneni lenmang shitaki odaksütsü atema arur," ta Shehbaz-i ashi.

Nawaz Sharif aija aliba ken o tem rongnung 2016 küm atokba Panama Papers scandal ya tongtibangtiba liasü, koba ajanga bendanglen company kar ajanga London nung par kinunger indang sen tasak jenjang kiojen alizüka aliba jangjadakja liasü.

Ajisüka iba ajanga PML-N yongtsü nung kecha tebandang madok aser linük ajunga nungi PML-N pusemertem Lahore aser Islamabad nung adenshiogo.

Nawaz Sharif-i PM mapa asemben tashi benogo, saka pa 2017 küm menden nungi atsüngtok aser taküm tepeyong yimden yimsütsüba nung shilem magitsü obendanga agüja liasü.

IMLIPENER TEPU

Aso : 1928

Asu : 22.10.2022

LATE SUNGJEMKABA (LONGSA)

Temeim oba, na onok nungi pilar tanü kum ka ajungba anogo nung onoki ne mapa tajung bilemtetter.

Ne ochi tamang sarasadem kodanga amajok makumer. Iba temoatsü nung onok anogo shia jajar.

Tanü iba anogo nung onoki na bilemteta sarasadema amonger.

Temeim Kinungtsü, Chirnur Semchirtem
Anükapang aser Kinungertem

NOTICE

- Approval under regulation-86 of CERC (Conduct of Business) Regulations' 1999 and CERC (Terms and Conditions of Tariff) Regulations' 2019 for determination of Transmission Tariff from Proposed DOCO to 31-03-2024 for Transmission Asset under Project - "Transmission System for North Eastern Region Strengthening Scheme-XIV".
- The beneficiaries of the above-mentioned Transmission system are: (a) Govt. of Arunachal Pradesh (b) Assam Power Distribution Co. Ltd. (c) Manipur State Electricity Distribution Co. Ltd. (d) Meghalaya Energy Co. Ltd. (e) Power & Electricity Dept. of Mizoram (f) Dept. of Power Govt. of Nagaland (g) Tripura State Electricity Board

S.No	Name of the Asset	Asset-I
1	Schedule DOCO (FR)	09.02.2022
2	DOCO (Actual)	17.05.2023 (Proposed)
3	Estimated Completion Cost (Rs in Lakhs)	5179.38

3. The annual transmission tariff for the tariff period 2019-24 is summarized as below: (Rs. in Lakhs)

Asset	2019-20	2020-21	2021-22	2022-23	2023-24
Asset-I	-	-	-	-	693.01

- A copy of the application made for determination of tariff is posted on the website of the applicant at www.powergrid.in
- The suggestions and objections, if any, on the proposals for determination of tariff contained in the application be filed by any person, including the beneficiary before the Secretary, Central Electricity Regulatory Commission, 3 & 4th floor, Chandralok Building, Janpath, New Delhi - 110001 (or other address where the office of the Commission is situated), with a copy to the applicant at the address of its corporate office within 30 days of publication of this notice.

Place: Gurgaon
Date: 17.10.2023
Sd/-
General Manager (Commercial)

POWER GRID CORPORATION OF INDIA LIMITED
(A Government of India Enterprise)
Registered Office: B-9, Qutab Institutional Area, Katwaria Sarai, New Delhi 110 016
Corporate Office: Saudamini, Plot No.2, Sector-29, Gurgaon, Haryana - 122 001
Website: www.powergrid.in, CIN: L40101DL1989GOI038121

A Maharatna PSU

Zhaleo-i CYO asayamung tenzüksü



Medziphema Village Youth Organisation aser Tenyiphe-II village youth organisation na mezüngbuba asaya masaya tsüngda Advisor, MAD & UD, Nagaland Zhaleo Rio, IAS (Retd.) nem asayartem metetdaksüba mapang tangokba noksa nung angur.

Chümoukedima, Mongputeni/October 21 (TYO): 52buba Chakhroma Youth Organisation asayamung October 21 nü Chümoukedima jila local ground nung tenzükogo. Iba asayamung ya Advisor, Urban Development & Municipal Affairs Dept., Nagaland Zhaleo Rio, IAS (Retd)-i tenzükja liasü.

Asayamung lapokba sentong nung Zhaleo-i, iba asayamung takok ngua ayongzükba atema CYO lenirtem, yimtsüng nung lenirtem, sponsor tem aser nübürtem shirnokisa teyari agütsüogo parnok ajak nem tenüngsang agüja liasü. Paisa, lenirtem akümtsübutüsü aser yimtsüng unit ajaki jangrabangra shilem agia teyari agütsütsüla, ta ashi. Rio-i, Chakhroma region kübok yimtsüng 44 nungi 26-i iba asayamung nung shilem agidar, koba shilem 50 shi lir ta shia taruba asayamung nungbo yimtsüng ajaki shilem agitsü ayongzükba liasü.

Rio-i, saisapong nung asenok

renloka aotsü mapang tonogo ta ashiba den temaba jenjang ya meranga inyakba ajanga dang tongteter ta ashi. Paisa, Naga nungertem dak sempet lir ta ashiba den T.Ao shibai temulungtetba tulu nung temaba jenjang tongteta 1948 Olympics nung India team anir ao, pa tatishitsü bener arua jembai.

"Libalirio azüokba, bendanga agütsüba, peisasa dak tamang katetba, health mesüra physical fitness amala ya asayar ka asoshi tenüngdaksü lir," ta shia Rio-i, lanurtem dang pei sempet, wadang jangjatsü aser ajak nung ayimdaker minyaki asaya ka nung dang moingin akümtsü ajungshia liasü. Rio-i ashiba agi, saisapong ajanga tenüng tajung bener arutsüba dang masü saka nisung ka mesüra kibong ka rongsenketzüng nunga temaba jenjangi ajungkettsü. Maneni pai, tsürapurtemi lenmang shidak sayutsü aser lenirtem aser lokti-i ayongzükba coaching nung amala agütsütsü ayongzük.

Asayar ka asoshi yi aser

temesepba mozü aser chiyongtsütem ya tsükchir tulutiba ta shia Rio-i ajak dang item nungi pila alitsü ajungshi. Paisa, nübürtem dang tribalism nungi pila alitsü aser kin ajaki shilem agitsüsa Chümoukedima district nung asayamung ayongzükba agitsü shidang.

Asayamung lapokba sentong ya CYO General Secretary Visielhoulie Kuotsu lenisüba nung agi aser Baptist Church New Chümoukedima Pastor, Ngusazo Kezo-i Tsüngrem temaotsü meshizüka sarasadem. Sentong nungsa CYO Tir Seyieneilhou Keyho-i lokti pela agizkba o jembai aser Kevikhoü Krose-i ken tajung ka atenba den CPO Tir Zhato Kimho-ia tayongzükba o jembia liasü.

Kasa mapang nung Games & Sports Secretary, CYO Seyievil Zhotso-i achayanga asayartem tenangzüktepba agi. Asayamung nung sentong balala lenir ji Visako Rino, Mhashevil Ltu aser Neivinuo Dzüvichü nung liasü. Asayamung ya October 28 nü tembangtsü.

MDFA Trophy pongunübuba osang

Mokokchung, Mongputeni/October 21 (TYO): Mokokchung District Football Association ayongzükba akaba MDFA Trophy 2023 tanu anogo pungonübuba mezüngbuba asaya KSR Team aser Lomuden FC asaya aser tanabuba nung Zonipang SA aser Sports Society Soyim tsüngda asaya liasü.

KSR Team aser Lomuden FC tsüngda asayaba nung KSR Team-i 6-1 agi Lomuden FC ayong ayonga dang akok.

Asaya tenzükür kelen minute 8 buba nung jersey no 14 Petevizo Kezico-i goal ka yok aser ano par telok nungisa minute 13 buba aser minute 86 buba nung jersey no 10 Rhitso Mero-i goal ana yok ano minute 24 buba aser minute 49 buba nung jersey no 23 Nisede Peseyie-ia goal ana yok aser

minute 32 buba nung jersey no 11 Yhoto Lohe-ia goal ka yoka par KSR Team-i goal 6 yoktet, iba asaya nung tajung kaji asayar shinga card machi aser Lomuden FC telok nungi jersey no 8 Obanglemzüngia minute 35 buba nung goal ka yoka score 6-1 nung iba asaya tembanga liasü.

Tanabuba asaya Zonipang SA aser Sports Society Soyim tsüngda iba asayaba nung telok anaprong nungi nisung anana Yellow Card achi aser parnokji Zonipang SA nungi jersey no 4 Watilemba minute 34 buba nung aser ano jersey no 9 Matemshiba minute 45 buba nungta achi aser Sports Society Soyim telok nungia jersey no 15 Yangersosang aser Jersey no 2 Bendangmongba minute 87 buba nungta chia liasü.

Zonipang SA aser Sports Society Soyim tsüngda

asayadang Sports Society Soyim Jersey no 8 Suponglepba-i minute 12 buba nung goal ka, Jersey no 10 Suyimmayang-i minute 35 nung goal ka, Jersey no 7 Noksangmeren-i minute 40 buba nung goal ka yok aser ano Jersey no 20 Shilusosang-ia minute 90 buba goal ka yoka par teloki goal pezü yoktet.

Zonipang SA telokia kanga dang meranga asayadang aser ariana Jersey no 8 Talijungba-ia minute 65 nung goal ka yokteta iba asaya Sports Society Soyim teloki 4-1 agi Zonipang SA telok kokteta liasü.

23-10-2023 MDFA Fixture

12:00Pm
Telongjem Vs 16 United Brothers
2:00Pm
Legendary Vs KSUM

Luke Shaw yiruba ajanga November tom tashi masayatetsü

Mongputeni/October 21, 2023 (Agencies): Manchester United coach Erik ten Hag-i ashiba agi, left-back Luke Shaw November tom nungiang asaya tenzükettetsü.

Shaw August 19 nü Tottenham pur 2-0 agi makokba asaya nung tetsüng yiruba sülen nungi tang tashi khen danga masayai arudar.

Pa United pur asaya teku aser England team asaya pezü nung masayatet aser ano maneni asaya aika nung shilem magitetsü.

November 17 nü England team Malta den masayatsü tsüngda Hag-i aniba team ya tenetben asayatsü lir.

United pur yiruba ajanga defence nung kanga tetsükdaksü adoka arudar, kechiyong right-back Aaron Wan-Bissaka-a September 18 nü yiruba sülen tang tashi masayateti arudar.

"Parnok yakta asaya tenzüksü, ajüsüa Luke Shaw bo yakta asayatsü mimlar," ta Ten Hag-i osangbenertem dang ashi.

"Aaron Wan-Bissaka yakta team training-i arutsü aser yamaji team nung densentsü," ta paisa shisem.

United pur Honibarnü Sheffield United den Casemiro medeni asayaago, shiba Brazil team Venezuela aser Uruguay den asayaba mapang yirua liasü.

"Mezüngbuba asaya nung pa asaya tema masayai adokatok, ajüsüa tanabuba asaya nunga asayaago, koba tongtambang liasü," ta Ten Hag-i Casemiro indang jembiba mapang ashi, shiba taruba Mongolbarnü Champions League nung FC Copenhagen den asayatsü aliba asaya atema suspend sür lir.

"Iba asaya ajanga pa nem kecha teyari magütsü, saka pa kanga mejungibo meyiru aser pa taruba hopta Brazil nungi arutsü aser pa league nung Manchester City den asayatsü aliba asaya nungbo shilem agitetsü," ta pai ashi.

United defender Raphael Varane aser Sergio Reguilon nabo yirur aliba tajungba kümogo, ajüsüa Tyrell Malacia aser Lisandro Martinez na taneptsü junga monguteti lir.

Iba season nung Hag-i aniba team tetoktepba ajak nung trokben tamakok nguogo aser parnok Premier League nung tang 10buba nung lir.

United pur tang club kibur dak sendakba nung mepetmesü adoker lir aser Qatari banker Sheikh Jassim-i, taoba hopta club alitsü merangdanga aliba nungi atsünginogo. Kasa mapang nung INEOS ngutetsang Jim Ratcliffe-i stake shilem 25 alitsü merangdar aser pai iba shilem alizüketra pai club inyakyim aziüktsü.

McKeown-i backstroke swimming record ajak benogo



Mongputeni/October 21, 2023 (Agencies): Australia tsür Kaylee McKeown ya tetsürtem rongnung backstroke disciplines asemprongla nung world record yangluba mezüngbuba asayar kümogo.

Lai Hokolbarnü Budapest nung World Cup asayaba mapang 50m backstroke tetoktepba nung otsü tasen ka yangluba sülen discipline asemprongla nung otsü tasen yanglua liasü.

Arishi küm 22 tain asayar yagi Hokolbarnü Budapest nung 26.86 second nung alizüng tongteta China tsür Liu Xiang-i 2018 küm otsü tasen (26.98) yanglur aliba ajateta liasü.

"Iba atema ni kanga pelar," ta McKeown-i ashi, shibai taruba küm Paris Olympics nung iba asaya amokbanger asayatsü imlar.

"Ni inyaktetsüba ajak agi,

meranga training agitsü aser kü dak aser kü coach dak maneni tamang akatsüba dang lir."

"Ni ni ya sprinter ka ama mebilemi liasü anungji iba otsü tasen yangluba ya kanga junger."

"Taruba küm tetoktepba kanga tasak asütsü, anungji ni kúsasa dak koda tali temulung lemteta akümer yamaji kü atema tajungba asütsü," ta lai shisem.

McKeown-i 2021 küm June ita nungi 100m nung world record bena lir aser lai taküm March ita 200m nunga otsü tasen ka yanglua liasü.

Lai July ita world championships nung 50m, 100m aser 200m backstroke asaya kokogo aser Olympic nunga 100m aser 200m nung gold medal ngur lir. 50m backstroke asaya ya Olympics nungbo masayar.

BILEMDANGANG

"Azümesenertem anema alitsü tasak."